



S droopische Basel und e Rais in en exootischi Wält

Es goot nit um Glymaveränderige.
Au nit um Glyymaaggtvischte, die glääbrige.
Ainewääg spiile d Droope e groossi Rolle
und isch z Basel e groosses Thema emoole.

S neie Droopehuus im Botaanisch Gaarte isch offe.
Noo drei Joor Bauzyt het me s bigoscht droffe,
nooch zer Uni zmitts in Basel e scheeni Oaase,
bim Beetersblatz glääge, Fraid fir Aug und Naase.

Dr Botaanisch Gaarte isch dr eltschti in der Schwiiz
1589 vom Caspar Bruhin grindet mit vuy! Eergiiz.
Är het e Herbarium gschaffe mit vierdausig Aarte,
jetz sin s iber säggsdausig im Botaanisch Gaarte.

Scho dreimool het men en au scho ziiglet,
erscht uff der Ryytheerasse bi der alti Uni aagsiidlet,
drno an dr Gaartestrooss bim Aescheblatz,
jetz bim Spaledoor amme scheene Blatz.

So e Rais muess nit zem Egwadoor fiere,
nei das kasch im neie Droopehuus gspiile!
E dunschtig schwiele Räägewald isch deert zem gniesse,
e Bsuech in en exootischi Wält duet sich aim erschliesse.

Straiffzuug vo dr bsundere Aart isch aazsträäbe,
Biodiwäärsidäät kasch deert hutnooch erlääbe.
E Gruch vo moodrig, moosig und fiecht,
und bsunders aamächelig, wieTitanwurz riecht.

Au s Droopeninstituut fiirt Jubiläum, s isch woor!
Am neie Sitz in Schwelleme, scho 80 Joor,
und so isch e Daag vo dr offene Diire vorgsee,
wo dausigi Bsuecher sin go s Droopeli see.

Zwai Diigermugge hän d Lyt bigaischteret,
die sin in dölle Goschdyym ummegaischteret,
dien sich under d Bsuecher schlyyche,
dä Steerefriid duet laider nimme wiiche.

Dr Zolli macht au uff droopisch mit em Voogelhuus!
E Dschungel kyymt in däm neie Droopehuus,
scheeni Gwäggs dien scho in d Heechi waggse,
und Wasser dreepfelet, griegsch nassi Haxe.

Scheeni Landschaft kasch gsee us Fels und Wasser,
e karibisch Feriefyyl, alles fiecht und so voll nasser,
und so dippig, as aim Glaider grad bliibe glääbe,
aber ooni Lyym, mit däm Aggtvischte dien lääbe.

Veegel fliege umme in dr Freiflughalle,
Bappegale us andere Kontinänt dien gfalle,
Asie, Afrika und Amerika mache gueti Luune,
und löön d Bsuecher luege und doll stuune.

Scheneroosi Genner und Spänder hän dä Keefig vergoldet,
dr Zolli het nit miesse spaare, isch worde tschent bsoldet!
Drum duet men em neie Voogelhuus huldige,
iiber d Gränze git s ganz grossi Biwunderige.

E Missgshigg het s gä mit Gwäggs us Costa Rica,
dr Zoll in Rotterdam het aifach alles vernichtet ghaa,
die sin nundefaane falsch beschrybe gsi, wie fadaal,
doch Mäzen hän die Koschte iibernoo, scheniaal.

Au langwiirig isch d Liiferig gsi vo Gwäggs us Borneo,
sin stegge bliibe bi dr Suez-Hawaryy, me kennt s vom Video.
Erscht mit Verspeetig sin die doch noo yydroffe,
und s neie Voogelhuus isch jetz ändlig offe.

Drno isch scho bald e grooses Fescht,
150 Joor fyyrt dr Zolli, das isch s Bescht,
CMS bringt e Schungge uuse zem Geburtsdaag,
mit vyle glaine Mischterli iiber dr Zollialdaag.

Au Basel isch im Summer e droopisch Gländ,
d Beheerde empfähle drum Gwäggs as Schattespänd.
Bi Hitzeinsle steen Baimli und Stuude in Kiibel,
solle s Glyyma verbessere, aaber seen us ganz iibel!

Faasnacht 2024, Chaise Wundergiggli

wundergiggli@luwin.ch

<http://wundergiggli.limnolofree.com>

<http://tinyurl.com/q43nawz>

https://www.facebook.com/Wundergiggli/photos_stream?tab=photos_albums

Druck: Thoma AG, Base